

# Leksyon

## 16

### "ANG KINABUHI NGA PUNO SA ESPIRITU SANTO"



1. Unsay kahulugan sa usa ka kinabuhi nga puno sa Espiritu Santo?
  - Mao kini ang usa ka kinabuhi nga gikapanguyan sa pagpangalagad sa Dios ug napuno sa Espiritu Santo.

Mga Taga-Efeso 5:18. Ug ayaw kamo pagpahubog ug vino kay anaa diha ang pagpatuyang; kondili magpapuno hinoon kamog Espiritu.

2. Sa unsang paagi mabatonan sa tawo ang kinabuhi nga puno sa Espiritu Santo?
  - Aron mabatonan ang usa ka kinabuhi nga puno sa Espiritu Santo, una sa tanan, gikinahanglan ang pagpakatawo pag-usab ug ang ikaduha pinaagi sa bautismo sa Espiritu Santo

Juan 14:7. Ang kalibutan dili makadawat kaniya tungod kay ang kalibutan dili man makakita kaniya ni makaila sa

kaniya, kay siya nagapuyo man uban kaninyo ug moanha siya sa sulod ninyo.

Mga Buhat 1:5. Kay si Juan sa pagkatinuod nagpangbautismo sa tubig apan sa dili madugay ang igabautismo kaninyo mao ang Espiritu Santo.

1 Juan 2:27. Hinonoa ang pagdihog nga inyong nadawat gikan kaniya nagapabilin diha kaninyo.

3. Unsay angay buhaton sa usa ka Cristohanon aron siya makadawat sa Bautismo sa Espiritu Santo?

- Ang usa ka Cristohanon mabautismohan sa Espiritu Santo, pinaagi sa pagtoo, sama sa gibuhay sa unang mga tinun-an uban sa mga pagpasalamat ug pagdayeg sa Dios.

Lukas 24:49, 53. Ug tan-awa igapadala ko kaninyo ang saad sa akong Amahan; apan pabilin una kamo sa siyudad hangtud nga masul-oban na kamog gahum gikan sa kahitas-an, ug didto sa templo nagkanunay sila nga nagdalayeg sa Dios.

4. Unsaon nato pagkasayud nga kita napuno sa Espiritu Santo?

- Ang gahum sa Dios mokunsad nganhi kakanato sama sa nahitabo ngadto sa mga tinun-an sa adlaw sa Pentecostes ug ang nagalain-lain nga pinulongan nga wala nato makat-oni.

Mga Buhat 2:4. Ug sila napuno sa Espiritu Santo ug nanagsugod sila pagsulti

ug mga pinulongan sumala sa ipalitok kanila sa Espiritu.

5. Sa unsang paagi nga mapuno kita sa Espiritu Santo?

- Mahimo nga kita mapuno kanunay sa Espiritu Santo pinaagi sa pagbuhat sa Iyang mga ipabuhat kanato, inubanan sa pagdayeg ug pagsalig kaniya.

Mga Taga-Efeso 5:17, 21. Busa ayaw kamo pagpakabuang, kondili sabton ninyo kon unsa ang kabubut-on sa Ginoo. Ug ayaw kamo pagkahubog ug vino, kay kana maoy pagpatuyang kondili magapuno hinon kamog Espiritu. Pagsinultianay kamo ang usa sa usa, sa mga pulong sa mga salmo ug sa mga alawiton ug sa mga awit nga espirituhanon, nga managawit ug magatugtog nga magadayeg sa Ginoo uban sa bug-os ninyong kasingkasing, nga sa kanunay magpasalamat kamo sa Dios Amahan tungod sa tanang mga butang sa ngalan sa atong Ginoong JesuCristo.

6. Unsay angay natong pagabuhaton aron ang presensya sa Espiritu Santo magapabilin gayud sa atong kinabuhi?

- Mahimo nga ang presensya sa Espiritu Santo nagapabilin sa atong kinabuhi kon dili nato sakiton siya pinaagi sa pagsumpo sa Iyang mga buluhaton.

Mga taga-Efeso 4:30. Ug ayaw ninyo pagsakita ang Espiritu Santo sa Dios, ni kinsa gikatimrihan kamo alang sa adlaw sa pagtubos.

1 Mga taga-Tesalonica 5:19. Ayaw ninyo pagpalonga ang Espiritu.

7. Unsay mahimong kausaban diha sa usa ka kinabuhi nga puno sa Espiritu Santo?

- Ang Espiritu Santo sulod sa iyang kalag, nagatabang kaniya sa pagpatubo sa Iyang Cristohanon nga kinabuhi, aron kini makapamunga sa mga kinaiya nga angay sa usa ka Cristohanon.

2 Corinto 4:16. Busa kami wala kawad-i sa kasibut, ug bisan tuod nagakahugo ang among pagkatawo nga makita sa gawas, ang among pagkatawo sa kinasuloran ginabag-o sa adlaw adlaw.

Mga taga-Galacia 5:16. Apan ako magalingon panaggawi kamo diha sa Espiritu.

8. Unsa ang mga kinaiya sa usa ka kinabuhi nga napuno sa Espiritu Santo.

- Ang mga kinaiya sa usa ka kinabuhi nga puno sa Espiritu Santo mao ang gugma, kalipay, kalinaw, pailub, pagkamapuangaron, pagkamaayo, pagkamatinumanon, kaaghop, ug pagpugong sa kaugalingon.

Mga taga-Galacia 5:22, 23. Apan ang bunga sa Espiritu mao ang gugma, kalipay, kalinaw, pailub, pagkamapuangron, pagkamaayo, pagkamatinumanon, kaaghop ug pagpugong sa kaugalingon.

9. Sa unsa pang mga paagi atong maila ang usa ka kinabuhi nga napuno sa presensya sa Espiritu Santo?

- Ang Espiritu Santo magatabang sa usa ka magtotoo sa iyang mga pag-ampo.

Mga taga-Roma 8:26. Sa ingon usab, nga paagi ang Espiritu Santo motabang kanato sa diha nga magmaluyahon kita; kay kita ugod dili man makamaong mo-ampo sa hustong inampoan, apan ang Espiritu mao ang mangunay sa pagpaampo alang kanato uban ang laglum nga pag-agulo nga dili arang malitok sa pulong.

10. Sa unsa pang paagi nga ang Espiritu Santo motabang sa usa ka Cristohanon?

- Ang Espiritu Santo magmando sa usa ka Cristohanon mahitungod sa mga butang nga may kalabutan sa iyang kaugalingon lamang.

Mga taga-Roma 8:14. Kay ang tanang ginamandoan sa Espiritu sa Dios, mga anak sila sa Dios.

11. Unsay kalabutan sa Espiritu Santo sa kamatuoran?

- Ang Espiritu Santo mao ang Espiritu sa kamatuoran, ug ang dakung magtutudlo ug magtutoltol ngadto sa tibook nga kamatuoran.

Juan 14:26. Apan ang Manlalaban ang Espiritu Santo nga sa akong ngalan igapaula sa Amahan siya mao ang magatudlo kaninyo sa tanang butang ug magpahinumdom kaninyo sa tanan nga akong gikasulti kaninyo.

Juan 16:13. Inig-abot sa Espiritu sa kamatuoran kini siya mao ang magatul-



tol kaninyo ngadto sa tibook nga kama-tuoran.

**12. Unsa ba gayud ang katuyoan sa Bautismo sa Espiritu Santo?**

- Ang naga-unang katuyoan sa Bautismo sa Espiritu Santo mao ang paghatag ug gahum sa mga magtotoo sa ilang pagpangagad sa Ginoo.

Mga Buhat 1:8. Apan kamo magadawat hinoon ug gahum sa diha nga kakonsaran na kamo sa Espiritu Santo; ug kamo mao unya ang akong mga saksi sa Jerusalem ug sa tibook Judea ug Samaria ug hangtud sa kinatumyan sa yuta.

**13. Nagahatag ba ang Espiritu Santo ug mga pinasahi nga mga pamaagi sa atong pag-alagad sa Dios?**

- Oo. Iyang gihatag ang mga gasa sa Espiritu Santo.

1 mga taga-Corinto 12:4. Adunay naga-kalain-laing mga hiyas apan adunay mao rang usa ka Espiritu.

**14. Unsa kining mga gasaha?**

- Ang mga gasa sa Espiritu mao ang pulong sa kaalam, ang pulong sa kahibalo, pagtoo, pagpangayo'g mga sakit, paghimo'g mga milagro, ang paghimo'g profesiya, ang katakus sa pag-ila sa nagakalain-laing espiritu, ang nagkalain-laing pagpanulti'g mga dila, ang paghubad sa panulti'g mga dila.

1 Mga Corinto 12:8, 11. Ngadto sa usa gihatag ang pulong sa kaalam pinaagi sa Espiritu, ug ngadto sa usa gihatag

ang pulong sa kahibalo sumala sa mao ra nga Espiritu ngadto sa usa gihatag ang pagtoo pinaagi sa mao ra nga Espiritu, ug ngadto sa usa gihatag ang hiyas sa pagpang-ayog mga sakit pinaagi sa mao rang usa ka Espiritu; ngadto sa usa gihatag ang gahum sa paghimo'g mga milagro ug ngadto sa usa ang paghimo'g profesiya ug ngadto sa usa ang katakus sa pag-ila sa mga nagkalainlaing espiritu ug ngadto sa usa ang nagkalainlaing pagpanultig mga dila ug ngadto sa usa ang paghubad sa panulti'g mga dila.

Kining tanang gidasig pinaagi sa usa ug usa rang Espiritu nga nagaapod-apod niini ngadto sa matag-usa sumala sa iyang kabubut-on.

15. Unsa pay laing mga gasa nga mabatonan sa usa ka Cristohanon nga napuno sa Espiritu Santo?

- Ang Espiritu Santo nagahatag sa mga hiyas sa pagpanudlo; sa pagpangmaymay, sa pagkamanggihatagon, sa pagdumala ug ang paghimog mga buhat sa kalooy.

Mga taga-Roma 12:6, 8. Ug sanglit nabatonan ta man ang espirituhanong mga hiyas nga nagkalain-lain sibo sa grasya nga gihatag kanato, kinahanglan gamiton ta kini kon sa profesiya, kinahanglan gamiton ta kini sibo sa gidak-on sa atong pagtoo. Kon sa pag-alagad sa atong pagpangalagad, ang nagtudlo, sa iyang pagpanudlo; ang nagamaymay, sa iyang pag-

pangmaymay, sa nagaamut, sa pagkamangihatagon, ang nagahatag ug panabang sa pagkamasibuton; ang nagahimog mga buhat sa kalooy sa kasaya.

#### ANG IMONG PAGABUHATON

1. Basaha ang mga Buhat capitulo 1 ngadto sa 5.
2. Ang Dios nagapangbautismo sa Espiritu Santo sa mga Cristohanon karon sa daghanag mga kasimbahanan. Iampo sa Dios nga magapadayon pa gayud ang Iyang pagbuhat niini.
3. Mag-ampo ka alang sa imong simbahan, nga ang imong pastor, mga dekanos, ug mga miembro mapuno unta sa Espiritu ug magamit niya.
4. Sag-uloha pag-usab ang tanang mga sag-ulohon.
5. Sublia pagbasa ang mga kalab-oton niining maong pagtulun-an. Imo ba silang nakab-ot. Pakigsultihni ang imong pastor o magtutudlo o imong higala kon unsay imong mga napupo niini nga pagtulon-an
6. Kon makasag-ulo na ikaw pag-ayo sa mga sag-ulohon, tubaga ang mga pangotana sa Talaan sa Tinun-an alang sa ika-napulog unum nga leksyon.

#### PAHALIPAY ALANG KANIMO!

Natapus na nimo ang mga leksyon ning atong pagtulun-an. Karon, sunda ang mga pahimangno nga imong makita sa katapusang bahin sa ika-napulog unom nga leksyon sa Talaan sa Tinun-an.